

## Steinmetz: Više plaće osiguravaju kvalitet rada, "metalci" u Austriji zarađuju oko 3.000 eura



U Austriji radnici u metalnoj industriji imaju plaće i do 3.000 eura – rekao je danas novinarima u Tuzli generalni tajnik Sindikata za proizvodnju u Beču Toni Steinmetz, koji zajedno s tridesetak predstavnika ovog sindikata boravi u posjeti Sindikatu hemije i nemetala Federacije BiH.



– Mi imamo 114 kolektivnih ugovora. Najlošije su plaćeni pekari i mlinari. Oni imaju oko 1.300 eura mjesečnu plaću. U metalnom sektoru je to drugačije. Kvalificirani radnici, koji su završili zanat, imaju platu oko 2.300 eura, a pravi majstori i do 3.000 eura mjesečno – ističe Steinmetz.

Cilj posjete predstavnika ovog austrijskog sindikata je da se umreže sa sindikatima u BiH.

– Mi ne želimo da u EU dođe neko s niskim plaćama. To je za obje strane loše. Iz BiH odlazi visokokvalificirana radna snaga i mladi, a mi u Austriji imamo 'importiranu' nezaposlenost. Naše firme onda dolaze u BiH, ne cijene radne zakone niti kolektivne ugovore što je za obje strane loše. Smatramo da se sistem treba mijenjati jer trebate dostići barem 70 posto prosjeka naših plaća, jer tako ćete sačuvati radna mjesta. Više plaće osiguravaju i kvalitet rada – pojasnio je Steinmetz.

Iako su radnici u Austriji dobro plaćeni, Sindikat za proizvodnju grada Beča se i dalje, kaže, bori za prava radnika.

– Borimo se, jer od prošle godine imamo Vladu koja je promijenila zakon o radnom vremenu. Sada je poslodavcima dozvoljeno da radnici mogu raditi i do 12 sati dnevno. Oni to mogu narediti, ali mi smo se izborili da radnici imaju stopostotni dodatak na dodatno radno vrijeme. Ali Vlada zato smanjuje socijalne standarde i želi privatiziranje zdravstvenog sistema. Toga se borimo, jer je to za sve ljude lošije – kaže Steinmetz.

Naglašava da Sindikat nastavlja borbu da se prava radnika u Austriji ne umanjuju, a u toj borbi žele pomoći i sindikatima u BiH čiji su radnici, kao je rekao, najlošije plaćeni u EU. (Fena, tl)

Date: 07-05-2019